

浙江
省立

圖書館三十周年紀念冊

浙江圖書館三十週年紀念冊

中華民國二十二年十二月



序

陳布雷

昔甲午之役以後，朝野益競言興學。維時刑部侍郎李公端棻於光緒二十二年疏請廣設學堂，同時並請設藏書樓，許人民入觀。顧其時風氣初開，各省雖先後設學，而於藏書樓則猶未喻其益智贖民之效，大率猶抱觀望。吾浙舊有文瀾閣，士子習窺美富，刼後興復，規制無改。省垣先輩願以閣書之效不溥，乃請當局別闢儲書之地，而浙江藏書樓遂於光緒二十九年成立，當時他省猶多未興辦，則吾浙不可謂非得風氣之先也。其後藏書樓遞演推進，成爲今之浙江省立圖書館；歲月遷移，自初創迄今適三十年。省立圖書館爰於今舉行三十周年紀念會，所以彰往績而策來茲，意良善也。余於民國十八年八月，承乏主持本省教育，鑒於本省圖書館事業之幼稚，以爲省立圖書館尤宜充其內容，樹之風聲；既爲增籌其歲費，又爲確定其組織，更畀以輔導本省圖書館之職責。其後張道藩同志繼長浙江教育，以大學路新建圖書館歸省館辦理，於二十年六月提請省府會議通過。比余再任今職，省立圖書館旋即開放其新館舍，並確定總分館之分配。於是浙館之規模漸擴，視他省之省立圖書館已不多讓。然檢其館藏之圖籍，審其各項之規制，則今日之成效，要皆前人辛勤於役之賜，此該館同人與浙江人士撫今追昔，所應共識勿忘者也。嘗考浙江圖書館成立之初，經費年僅五千元，人員則至民國十年左右猶僅十一人；今則經費人員，皆遠增於昔，則其苟有尺寸之成效，要亦應盡之職責。且以圖書館歷史之久，積藏之繁，有待於整理以暢其用者正多。該館同人，更應追懷前人之勤勞，體公帑之艱難，勤謹將事，承三十年之積緒而更光大之，期無負使命。本省社會各界，亦望隨時予以指導與匡助，俾得更有進展；海內人士，鑒於本省圖書館事業之不逮，及省立圖書館應興應革之點，不吝督教，自尤爲本省教育當局與該館同人之厚望。抑更有進者，近世國家以智能爲競勝之基，而圖書館實與學校同負增進民族智能之使命。今國運艱屯已極，而民智之否塞猶是，故圖書館在今日中國所負之使命乃愈重。將如何使圖書館事業爲今後民族復興之一主力，尤有望於全國圖書館與教育家共起圖之者。省立圖書館於舉行卅周年紀念之際，復彙編其館史與現狀爲紀念冊，而索序於余，爰略述余所感及所望於該館者如此。民國二十二年十二月陳布雷

浙 江 省 立 圖 書 館
三 十 周 年 紀 念 冊
目 次

序

浙江省立圖書館小史

本館大事年表

本館歷任館長簡表

本館圖說

共二十七幀

細目分見原圖

本館二年來設施紀略

浙江省立圖書館小史

中國之公家藏書，雖淵源甚遠，而近代圖書館之興設，則猶爲近三十年事。顧今日各省立圖書館，其歷史常僅二十餘年或不逮二十年者，本館則溯自浙江藏書樓之創設，至今適爲三十年。三十年來，積前賢之勞勩，繼承發揚，得臻今日之規模。彰往策來，要不可以無紀。而舊檔殘缺，徵詢匪易，館史之輯成，未可遽幾。茲惟最舉大事，溯其淵承，跡其變革，略述爲篇，以彰往績，而詒當世。

一、藏書之淵源

浙江公家藏書之業，由來甚遠。昔宋室南遷，卜都臨安，太學書庫，版刻率先諸路。元改太學爲西湖書院，藏書尤富。今西湖書院書目刻石，猶存於文廟碑林中。明代於杭州府學重建尊經閣，藏書萬卷，設訓導領之，師生誦觀，藉其出納。降逮清初，猶仍此制。蓋私家藏書，吾浙素爲著名，猶不能與圖書館相並論，而如西湖書院尊經閣之遺制，固不可謂非近世圖書館事業之濫觴也。

今本館珍藏之一，厥爲文瀾閣四庫全書。故文瀾閣之建置，實爲本館藏書之淵源。乾隆時纂修四庫全書，內廷四閣既告成。以江浙爲人文淵藪，特詔別繕分頒，增建三閣，文宗文匯既成，文瀾閣則於乾隆四十七年（一七八二）建於杭州孤山麓聖因寺行宮之西，開書則於五十五年（一七八〇）後陸續頒藏。設太乙分青之室，士子願讀中秘書者，許其領觀傳寫。於是浙江學者，咸得飽覽珍秘，發奮於學。及至太平之亂，杭城再陷，文瀾閣亦與於難。（一八六一）賴錢塘丁氏竹舟松生二先生之拾殘補闕，得數千卷。光緒六年，（一八八二）巡撫譚文勤公（鍾麟）與復文瀾閣，書亦歸其舊。丁氏復發起鈔補闕簡，至二十四年成書已三萬冊。雖猶未竣全功，要已差復舊觀。而乾嘉間省垣誦習之盛，庶得復跡。以視鎮揚二閣興設一時經亂遂遏者，浙省不可謂非天幸。其時文源亦早燼於兵亂，迄清季之四庫書，除內府（文淵）陪都（文溯）熱河（文津）三部外，所存者惟浙之文瀾閣而已。其後圖書館增建，移閱書於館中，至今爲本館之名藏焉。丁氏之興復文瀾，曾別紀爲篇；閣史則館友張君已爲詳文備紀之，茲不復詳。

二、浙江藏書樓之創設

甲午戰後，朝野競言自強，於是除設學校以外，識者亦謀仿歐西圖書館之制度，更有創立圖書館之議。杭州舊有東城講舍，爲官師課士地，其中略有藏書。光緒二十八年（一九〇二）郡紳邵公伯燮（章）胡公藻青（煥）請改講舍爲藏書樓，旋又請款另建。二十九年，提督浙江學政侯官張公錫鈞（亨嘉）從其議，乃相地於大方伯里，以值八千元購入劉氏民房，移東城之舊藏，并增購新書以實之，名曰浙江藏書樓。次年布置就緒，聘楊見心先生（復）爲監理，主館事，訂立藏書閱書借書規程，編定甲乙編書目。張公並爲文以記之。（見附錄）維時文瀾閣雖已興復，設書閣董事，但「局鑰森嚴，士子未便輕入」，（見邵章等呈學政文）蓋徒矜皮藏，未暢其用。自藏書樓成立，而學者觀覽，蔚然來集。其地即今本館之新民分館，其規制實本館成立之初基也。

三、浙江圖書館之成立與官書局之歸併

自日俄戰後，清廷始下預備立憲之詔。宣統元年，學部奏定預備立憲分年事宜，定各省圖書館於民國二年一律開辦。當時吾浙藏書樓成立已六年，規模粗具。浙江巡撫增公子固（韞）乃謀改藏書樓，歸併浙江官書局，擴爲浙江圖書館，設「創辦浙江圖書館事務所」，委提學使丹徒支公季卿（恆榮）兼督辦，聘本邑吳公雷川（震春）爲會辦，委湘鄉許鄧公仲期（名起樞）爲坐辦。（案爲雙姓）已而吳公辭職，乃改聘錢塘孫公厘才（智敏）加聘楊公見心（復）爲會辦。增公以是年閏二月入奏，三月奉准，四月擬具「書局書樓歸併圖書館暫行章程」，於是浙江圖書館始成立，藏書凡七萬卷。宣統二年，雲南袁公樹五（名嘉穀）繼支公爲提學使，即兼圖書館督辦，委俞公陸雲爲監督，另委提調王公，並司館事。袁公旋又徇省人士之請，請當局於文瀾閣旁建館儲書，（見下述）於是浙江圖書館之規模更擴，而文瀾閣與館亦併而爲一焉。

圖書館改名之初，自藏書樓以外，即歸併前浙江官書局，茲故略述官書局之由來於此。初太平之亂既定，曾文正以匡翼中興爲職志，導揚文教，設局雕版於金陵，蘇揚武昌仿行其事，而吾浙亦聞風興起，一時號爲五書局。浙江官書局成立於同治四年，設於省城小銀巷之報恩寺，聘一時名宿任編校，雕版印書甚多。（書版即

藏於中正巷三忠祠。自是相沿，迄於光緒季年而無改，四部名籍與地方掌故之書，賴以推行甚廣。及增公請改藏書樓爲圖書館，遂以官書局裁併於館，該局每月經費亦撥歸圖書館，並改其名爲浙江官書印售所，爲圖書館之一部分云。

四、孤山館舍之建築與圖書館文瀾閣之合一

藏書樓之創設，屋宇係購入民房充用，頗感狹溢。及袁公任圖書館督辦，乃具呈巡撫增公，以爲宜於聖因寺行宮餘地，建館儲書，俾與文瀾閣毗連一氣。增公據以疏請，（見附錄）清廷允其請，乃就孤山文瀾閣西首即行宮餘地於宣統三年五月動工建築。其建築費初由藩司定爲三萬元，後經諮議局核減爲一萬九千〇六十七兩。同時諮議局復以文瀾閣與圖書館同爲藏書，不宜分立，議決以文瀾閣併歸圖書館，閣之經費即歸館領。是年六月中旬，圖書館即派員會同文瀾閣總辦張蔭椿移交接管。惟僅定統局，閣本仍置閣中未動也。

孤山圖書館舍建築之時，文瀾閣牆柱傾側，擬加修理，亦經圖書館於六月開工修建。至館屋之建築，則以工程較大，至八月（以上皆記陰曆）武昌革命事起，工遂中輟。民國元年，經都督署令繼續建築，至元年夏落成。是年二月，浙江都督蔣公尊簋委歸安錢念劬先生（恂）爲館長，嘉興龔味生先生（賓銓）副之。及館舍既成，錢公遂請移閣本四庫全書實館中，爲之重編閣目，（今所印之「壬子文瀾閣所存書目」即是）同時並廣徵四部圖籍，次第編目。十一月，錢公辭職，巡按使署教育司長沈衡山先生（鈞儒）乃委第三科長朱敦先先生（希祖）暫兼代館長。十二月四日，始正式委龔先生爲館長。

孤山館舍落成以後，布置設備整理編目凡半年餘，至民國二年三月二十五日正式開幕，改大方伯之舊館舍爲浙江圖書分館，改稱官書印售所爲印行所。全館職員，自館長以次，有監理兼編輯二人，檢校兼文牘一人，庶務兼會計一人，司書生四人，印行所職員凡三人。全年經費六〇一二元。當時藏書，以卷數計之，有四庫全書七萬二千七百八十卷，圖書集成及殿版書一萬五千餘卷，宋元明初清刻及精鈔本一萬三千七百餘卷，（以上時稱保存類）此外通行本書十四萬五千二百餘卷，（時稱觀覽類，可以出借）合計二十四萬餘卷。（冊數不詳）編有書目，視藏書樓初設之時

數倍之。蓋自是本館與文瀾閣既已合而爲一，館舍亦拓爲二處，規模益見美備。自茲以迄本年（廿二年）三月，適爲二十年也。

五、浙江公立圖書館之演進

民國二年孤山館舍開幕之際，錢先生已辭去，龔味生先生任館長。徐杭章仲銘先生（箴）任監理兼編輯，於編目頗多盡力。龔先生旋因病請假東渡就醫，民政長朱公（瑞）遂委章氏代理館長。直至十一年龔先生辭世，六月，教育廳長朱公國禎始正式委章先生爲館長。章先生久居代理，實主館政，繼承董理，擘劃尤勞，直至民國十六年四月始辭職，在館凡十四年，於館事建樹尤多。館之名稱，原稱浙江圖書館，二年曾改浙江省立圖書館，至五年一月，始遵新頒規程，更名爲浙江公立圖書館。直至十六年改政以後，始稱浙江省立圖書館。故自民國四年至十六年六月，凡十二年間，可稱爲公立圖書館時代。其間以經費之限制，範圍稀所增拓，書籍亦不克多爲添購；然維持發揚，使本館基礎益臻堅固。其演進之跡，茲惟絮要而述其略。

1 圖書之增添 自民國四年至十六年，每年經費，自數千元增至一萬五千元，故可資購書之費，甚爲有限，其間亦有外界捐贈及當局頒發者。以十三年爲例，購入之中外文書四百四十七種，雜誌共五十三種，捐入中西文圖書二百四十八種。以此爲例，則十二年間所添圖書當在八千餘種也。

2 圖書之編目 當時圖書之分類，悉依四部部類，編目僅以著者書名列於冊。其時年有年報，隨時編錄公布。其編印成冊者，有民國十年出版之保存類目錄二冊，十二三年間編成之通常類目錄八冊，大抵皆章仲銘先生所編訂者。

3 閱覽之進步 當時閱書情形，大抵來館取閱，甚稀出借。自民國三年至十五年，皆有數可稽。以其足見閱覽風氣之進步，列閱書人數如次：（閱報人數後數年有統計，不列入）

民國三年	約二千人	七年	八八四六人
四年	六〇八三人	八年	七五七二人
五年	六四一三人	九年	一五〇九二人
六年	八五〇二人	十年	一六二二〇人

十一年	一七八七五人	十四年	一五八六一人
十二年	一〇二一三人	十五年	一四二八一人
十三年	一四九五〇人		

以上皆爲閱覽人數。關於借書出館，原無定例。至民國六年，始定借貸圖書辦理法，次年又規定借書繳納保證金之例。是年始有借書統計，僅九十二人。自是直至十二年，每年借書僅一百餘人，至十三年始逾二百人，十五年達六百四十九人。及十六年新民分館延長晚間開放，閱借始激增云。

4 年報之編輯 民國五年，創編年報，以十二月出版。其旨趣內容，略仿日本帝國圖書館之季報，我國各圖書館之刊行館報，此可爲其嚆矢。其內容除保存類觀覽類書目外，有閱書統計表與報告書及公牘附錄。自是直至民國十五年，年出一冊，共出十一期云。

5 書籍之刊行 當時印行所爲圖書館之一部分，其經費亦合而不分。印行所除印售局版圖書以外，復次第雕版刻書，同時亦即圖書館之事業。最先刻行者爲丁謙氏之蓬萊軒地理叢書，（民國五年刻一集，時稱浙江圖書館叢書）其次則爲台州經籍志（五年至六年）章太炎氏之章氏叢書（六年至八年）溫州經籍志（九年至十二年）及通鑑輯覽諸書。（民國十一年）其間又曾以鉛字排印章實齋之章氏遺書，後又自會稽徐氏得鈔本二十四卷，謀付刊，以紓於費而輟。

6 版片之增收 除繼承局版新刻上述諸書外，更有捐贈之版片。其最著者，爲民國五年譚復堂（獻）之半厂叢書版片由其後人交館附售，及民國十年汪氏振綺堂之家刻十二年胡氏退補齋刻之金華叢書先後贈館。

除此以外，更有一事關於擴充館舍者，不可不紀。民國初年，以某國太子將來杭休居，當局爲建館於孤山館西地，名迎賓館，後未果來，其屋爲當道酬宴之用。五年七月以館舍不敷用，呈准民政廳撥迎賓館爲休息室辦事室等，即今孤山分館西進樓房是。此外如十一年之派員赴平津寧滬各地考察，十三年之組織省會圖書館協會，十四年之參與發起中華圖書館協會，歡迎美國圖書館學者鮑士偉，亦皆其間較重要之事蹟也。

民國十六年二月，國民革命軍底定浙江，至四月而定都南京。於是時局激變，館務亦曾一時呈停滯之象。及政務委員會基礎既定，本館遂亦奉令改組。此後事蹟，可更爲一新時期焉。

六、文瀾閣四庫全書之鈔補完成

茲於未述十六年以後館事以前，當更補叙本館藏書之一重要掌故，則四庫全書之鈔補完成是也。

丁氏之鈔補四庫全書闕簡，余曾別爲文以紀之，茲不贅述。（見本館月刊一卷七八期丁氏與復文瀾閣書紀）丁氏之冒險拾殘，得書凡九千有六十二冊。（同治十三年止）其後百計購鈔，自光緒八年至十二年冬，成書二千八百種，合前共得二萬八千冊。（此據文瀾閣志應實時之呈文，王同文瀾補書記則云至十四年已得三四七六九冊，廿三年時所缺僅一千四百冊云。恐王說誤。）故全書雖大半補全，而待訪猶多。提學使袁公嘗輯閣目待訪，未嘗盡力蒐集。其後經乙卯補鈔癸亥補鈔之二役，開書始配寫獲全，略紀如次：

乙卯補鈔 當錢公念劬受命長館，開書已決歸入，錢公檢對閣書，嘗寫定「壬子所存文瀾閣目」四卷，於缺者列待訪書待訪卷兩門。錢氏既去職，獨於此事拳拳不忘。民國四年乙卯，乃發起集款補鈔。以公款及私人捐款六千二百餘元，補鈔缺書十三種，缺卷二十種，都二百六十八卷，又購回已有丁鈔之舊鈔殘本一百八十二種，是謂乙卯補鈔之役。其時本館章仲銘先生據補鈔者編爲乙卯補鈔閣目一卷，刻版附於原文瀾閣目之後焉。

癸亥補鈔 民國十一年壬戌，海寧張閔聲先生（宗祥）長浙江教育廳，倡議續前人未竟之緒，募集捐款，從事補鈔。當時盧子嘉（永祥）督浙，捐銀四千元，張喧初（夏定侯）（超）張詠霓（壽鏞）張適園劉堅匏（錦藻）劉翰怡（承幹）沈冕士（銘昌）周夢坡（慶雲）張菊生（元濟）徐冠南（棠）諸先生等四十六人共捐款一萬二千二百元。推評議幹事八人，會計幹事一人，稽核幹事二人，聘堵申父先生（福詵）爲監理，而張氏總其成。先就杭州所有者鈔之，繼赴北京借文津閣本鈔其闕者補其漏者，並逐爲詳校，費時二年，竭寫生二百餘人之力，用費一萬六千六百六十九元有奇，凡鈔缺卷缺

書二百十一種，四千四百九十七卷，都二千四十六冊。復將丁鈔擇要重校者五千六百六十卷。迄十五年（丙寅）四月而底於成，送書貯館中，是爲癸亥補鈔之役。（以作始於十二年故云）蓋至是文瀾閣四庫書除略有缺卷外，已得復其全璧。自丁氏拾殘之始，迄於此凡六十二年，而閣書得全。本館今日之得擁有完全之四庫書，實賴六十年來多人之熱忱勞績，此又今日紀念本館成立之中，所應感念不忘者也。（案閣目及本館館報均列此次補鈔後尙缺書一種，卽衛生十全方與奇疾方，缺卷二十六種，爲周易新譚義等書。實則衛生十全方固爲閣中所不備，證以中央圖書館籌備處影印庫書草目及陳援庵先生簽注，尤可知此書爲七閣所皆無。缺卷之中，惟三吳水考卷八九爲當時漏鈔，今已向北平圖書館訪得續據文津本鈔補，此外皆文津本原缺。方將訪求文淵本檢對補缺，值其南運扁藏而罷。其具茨詩集本堂集等已訪得國學圖書館有舊本可補鈔數卷，餘尙待訪。案四庫鈔書之時，各閣本皆有缺卷，參差不同，而因底本殘損爲七閣所皆缺者亦有之，是今日文瀾閣本之缺卷，要皆原缺，訪孤本而補之固可，謂其於恢復原狀未竟贅覆則非也）

文瀾閣之原址，自民國元年移書於館以後，仍爲本館所保有。民國十七年，吾杭舉行西湖博覽會。次年秋，省政府以博覽會所徵得歷史古物及科學生物標本爲基礎，創設西湖博物館於浙江忠烈祠地，以房舍不敷，乃暫指定文瀾閣爲該館歷史文化部之用。惟書與閣雖睽隔，而相去咫尺，覽閱書者，猶易走訪其原址而依稀考見閣之規制也。

七、改稱省立圖書館與擴充組織

民國十五年以前本館之事蹟，已見前述。十六年爲國內政局轉變之一年，本館亦因緣時會，經澈底之變革。當革命軍初定浙江之時，章仲銘先生辭職，（四月）由館中主任鄞縣范均之先生（承祜）繼其任。六月，浙江省政務委員會成立，對本館議廢館長之名，改設總主任，委豐城楊以明先生（立誠）任之。其組織仍分中國文及外國文書爲二部，各設主任一，編纂員二人，增指導員一人，餘仍其舊。並改公立圖書館之名爲浙江省立圖書館。自是以後，名稱既改，主持者亦易人，經費亦於次年增加，（見後述）於是人員既增，購書亦多，規模漸擴於昔矣。

自十六年至二十年，五年之間，本館各種設施，大抵仍繼承前軌，漸加推進，茲亦析爲數端，權言其要如次：

1 編目之改革 館中編目，向仍舊法。民國十七年夏，始着手對新出平裝書及西文書用王雲五統一分類法分類，編目製卡。惟所有線裝書（時稱通常類甲，以平裝書爲乙）則仍續舊例輯爲書目續編，未付梓。惟自十一年後續到善本書則於十九年印成善本書目續編一冊。此外又於十八年後將一部分線裝書製匣云。

2 組織之更張 館之組織，在十六年改組時猶以中外文書分二部，至十九年八月，教育廳頒布本館暫行章程，分徵集編纂閱覽推廣四組，各定職掌，每組設一主任。次年，又以文牘等職無統屬，增設總務主任，而統括之曰總務處，爲今日組織之所本云。

3 閱覽之發達 十六年秋，鑒於新民分館交通便利，閱覽者日增，乃增開夜館，即延長開放至晚九時，出納分班輪值。至十七年又在新民分館添設兒童閱覽室。自是閱覽人數日增，惟當時統計係將閱雜誌日報之人數併計之，故與其前及今之不計此數者標準不同，茲不備列。而借書則悉限以納保證金，似不便於推廣云。

4 流通與輔導事業 自十九年改定組織，特設推廣組，主持推廣圖書之流通，及對各縣市圖書館之輔導。於是在市區先設流通圖書部三處，民衆閱覽處一處，二十年又設流通部於江興輪，舉辦巡迴文庫，又試辦讀書會。輔導事項，則先與各館通訊研究，並着手製表調查館況云。

5 出版書版 十六年秋，以舊有年報體例宜加擴充，改其名爲館報，第一卷以是冬出版。初意半年一刊，其後平均仍爲每年一冊，至二十年十二月出版第六卷。（以三四卷合冊，共爲五冊）至此外本館出版物，多爲十八年以後所出版。編印之單冊，有中國藏書家考略（十八年四月）四庫目略文瀾閣目索引（十八年八月）叢書子目索引（二十年五月）等書。而館藏山陰姚振宗氏未刊名著快閣師石山房叢書，則十八年十月以後以珍本叢刊名義先後出版，至二十年冬凡出四期云。

6 印行所之擴充 印行所之事業，限於木印書之印售。至十八年秋，以籌印鉛印刊物並協助宣揚學術之旨趣，呈請省當局添設鉛印部，撥開辦費九千餘元，賃屋

水陸寺巷，於是年十月成立，而稱舊木印部分爲木印部。自十八年度以前，印行所預算皆爲本館之一項，十九年度始劃分獨立云。

至於本館之經費，則十六年度以前，原爲一萬五千元之則。十七年度以事業增拓，增至三七一〇四元，（內印行所等九一七三元）十八年度連印行所鉛印部用費共列五〇四一一元，（內印行所一七一〇八元）至十九年度除印行所外，預算爲三九二二二元，印行所預算另列三〇二四九元，營業收入解庫。二十年度仍之。觀此則此五年中經費之增加似頗不少。故購置書籍，在此期間平均較十六年以前大增。本館西文圖書，多爲此時所購入，（統計冊數從略）而中西文雜誌增添尤多。

民國二十年六月，楊君辭職。教廳原擬委科長趙君步霞（冕）繼之，不就，旋又改委館長，亦以故未就事。至九月十六日，教廳乃改委廳督學新昌陳弼章先生（載章）兼代館長。其時大學路新建之圖書館已落成，陳君奉令於是年十二月會同浙大辦理接收。復從事平裝書目之整理，並訂定機關人員借書辦法。因九月以前閱覽會經停頓，故自九月至歲杪，閱覽殊見發達云。


八、館舍之增闢與現制之確定

本館之館舍，在三十年前始購置新民路之民屋，殊患仄隘不適於用；二十年前相地於文瀾閣西以建館，雖幽雅靜適，然與市區相距較遠，交通不便，識者皆以省立圖書館之館舍不適於用。公費既絀，未能興建。會故浙督紹興湯蛰仙先生（壽潛）於民國六年逝世之際，遺言捐銀二十萬元於本館之教育事業，哲嗣拙存先生（孝估）於十六年激足捐銀，並建議以此款興建圖書館館舍。省府從其議，擇定大學路（蒲場巷）公地，責成浙江大學會同本館建設廳等組委員會主持建築。時行大學區制，特定計劃，由浙大綜其成。以十七年二月興工，十九年八月竣工，繼續進行各項附屬工程，至二十年三月始完全竣事。總計湯氏捐款本息二十六萬元有奇，省政府補助三萬元，實計用於館舍者十九萬元有奇，購西文圖書三萬元，餘則悉爲各項內部工程及設備之用。（余曾別爲紀略一文，見本館月刊一卷五六期）至二十年六月，浙江省政府以籌劃圖書館統一管理之方，於四一一次會議通過教育廳之提議，以新建圖書館令本館接收辦理。本館卽於是年十二月十五日接收。又以內部未了工程及時

局之關係，直至二十一年九月十五日始行開幕。於是定大學路新館舍爲總館，爲全館事業之中心，改孤山之館舍（原爲總館）爲孤山分館，爲四庫全書善本書庫，新民分館則置一部分通俗圖書，仍設兒童閱覽室。本館現時之規制，始於是時確定云。

新館舍之歸併，在二十年冬陳君弗章兼館長之時。二十一年一月，省政府委訓慈繼承其職。越九月始將新館舍開幕。惟自任事迄今，瞬將二年；其間除擴充館舍全賴前人之嘉惠以外，其他設施，殊稀成效。既因備館務之報告，別述爲篇；（見後二年來設施紀略）茲文重在往蹟，於二年來經過之要事，不復具贅。

本館以浙江藏書樓之創設，迄今適爲三十年，爲紀念往績，特定二十二年十二月三十日舉行三十周紀念會，並自三十一日迄廿三年一月三日舉行展覽會四天。



本文循述本館之往史，自藏書上溯於文瀾閣之淵源，循序以述三十年來之變革，雖舊事不無舛漏，詳略又多失次，然本館遞變演進之要事，要已備見於此。大抵言之，自藏書樓初建以迄宣統三年，可謂爲本館之萌芽時期，雖規模較隘，而基礎實奠於是。自民國二年迄十六年，可謂爲漸進時期，館舍既闢二地，圖書編目及刻書等事復多進展。自民國十六年以後，可謂爲恢宏時期，蓋經費增高，組織擴充，而事業亦推廣，至二十一年添闢新宇，而規模乃愈擴。積年累月，得臻今日，凡現時之成效，何一非前人辛勤艱苦之賜，而如何善繼前軌，漸圖發揚，本館同人，無時不懷負荷之不易也。間嘗思之，近代圖書館之要素，一爲建築設備次爲圖書，三爲經費，四爲人力。今本館之新舍及其設備在各省立圖書館中已爲罕有，圖書則館藏已達二十五萬冊以上，視他省亦未遜。至經費則本館自十九年度至二十二年度，雖因省庫困難而遞減，及分配三館而力分，但全年預算五萬元有奇，較十六年以前已增不少。惟所謂人力，則以同人之學淺力薄，而處理此積藏繁富性質複雜之一圖書館，實有不能勝任之虞。繼今以往，同人固當竭其所能，黽勉以赴，尤望本省當局與社會，時予以切實之指導與匡助；而全國先進，鑒浙館歷史之淵久，當亦能不吝教督也。

浙江藏書樓碑記

本館之正式成立，始於光緒二十九年之創設浙江藏書樓。當時倡其議者爲郡紳邵公伯駿等，而主其事者則爲學政張公錫鈞（亨嘉）。既成，張公爲之記，吳公綱齋書之，勒石於館，今其碑猶存原址，即今之新民分館，去年秋，爲重立於藏書室東側，以便衆覽。張氏之文頌清德而薄西學，固已爲今之所不取，然本館建置之始之經過，略可窺見，爰載之於此，蓋本館成立最早之紀念文字也。

天以教育宏我聖清，乾隆四十七年。四庫全書告成。繕寫頒發。而浙之文瀾閣遂與文宗文匯鼎峙東南。四十九年。復申領出傳寫之諭。其時遠人賓服。四方無虞。天子振興學校。以奮海內之士。何其盛也。比經兵亂。典籍殘闕。私家藏棄。都付劫灰。賜書重地。巋然獨存。而秘笈嚴扃。莘莘學子。亦無復弦誦其中者。蓋去乾隆時百餘年矣。光緒二十八年。余來視學浙中。俛仰文瀾閣遺跡。思有以敬承之。而杭之東城故有書樓。蓋本講舍之遺址也。余以邵吉士章胡部郎煥等言。躬往案視。見其地居僻左。屋宇湫隘。且儲書未廣。無以饜閱覽者之心。因謀擴充其制。度地於城之中央。商之撫邵公緝槻。行省翁公曾桂。借官錢奏請改建。增拓規模。廣置圖籍儀器。俾官紳士子之願學者。均得恣其漁獵。以冀讀書者衆。而豪傑之士出於其中。稍闡文瀾閣藏書之精意。非僅規撫西法已也。從來國家之興。必務民教育而開知識。迺能自衛其羣。而愛國之心益固。秦之強也。愚民而亡。元之雄也。儒術不競。自古及今。未有恃勢力而久存者。東西各國強弱有時。大小不一。然學優則民智。學絀則民愚。智者日著富強之效。愚者立見危忘之憂。此其彰明較著者也。書樓之法。輔學堂以行。在各國最稱善政。豈知夫中國聖人。已先百年爲之者。人臣侈談西法。顧於本朝掌故。昧焉弗詳。非所謂大恥也邪。抑文瀾閣之書。仰蒙聖人睿鑒。故收藏富而別擇精。今中外遂譯之籍。何可勝數。一有不慎。則似是而非。足以移視聽而溺人心。轉爲政治生民之害。是在持風化者加之意也。余北行

有日矣。幸及觀書樓之美備。輒論述聖制。而以藏書之義謹著篇末。庶後來之君子覽焉。光緒癸卯南書房翰林大理寺少卿提督浙江學政侯官張亨嘉譔。四品銜翰林院編修南書房行走提督江西學政錢塘吳士鑑書。石門胡纘篆額並刻字。

附 錄 二

浙江巡撫增韞請建浙省圖書館疏

清宣統二年。浙江巡撫奏請撥文瀾閣西首行宮餘地建圖書館。其時浙江藏書樓成立已八年，且已改稱圖書館。而文瀾閣書既未合藏。藏書樓又狹隘。自增氏此奏得准，於是閣與館合而本館始有孤山寬廣之館舍，原疏文字中，多聖恩皇仁等辭，要以時代不同。而請建之經過與當時之思想，頗可考見，爰重載於此，亦有助館史之談資也。

浙省圖書館業經臣於上年（案即宣統元年）奏請建設。將官書局藏書樓歸併擴充。相地建築。欽奉硃批該部知道。欽此欽遵。本年二月復經臣將圖書館撥歸學司管理。業經將辦法大綱詳經臣核定飭遵在案。茲據署提學使袁嘉穀詳稱，浙省山川秀異。人文薈萃。高宗純皇帝省方巡幸。特頒四庫全書。建文瀾閣於西湖聖因寺行宮內。與揚州文匯鎮江文宗並峙。聖因寺者，聖祖仁皇帝南巡時行宮遺址，雍正時改建佛寺，虔奉御碑者也。純廟南巡。復建閣其中。有旨令士子願讀中秘書，得入閣傳寫。滿恩汪濊。萬彙明悅。於以發忠愛之心。澄教化之原。由來久矣。咸豐辛酉間，閣燬。遺書散佚。存不及半。光緒六年重修。搜葺補繕。始完舊觀。不致與維揚金山同歸灰燼者。乃歎兩浙之沾沐列聖遺澤。較他省爲尤渥也。今各省圖書館經學部奏定豫備立憲分年事宜。限宣統二年一律開辦。浙人習窺美富。謂宜於聖因寺行宮餘地。建館儲書。俾與文瀾閣毗連一氣。尤足揚文治而昭盛概。西湖素擅形勝。出湧金錢塘清波三門。舉足即是。無登陟之勞。塵囂之慮。相地勘築。此爲最宜。伏查上年京師籌建圖書館。學部奏請賞給熱河文津閣四庫全書暨避暑山莊各殿座

陳設書籍。並飭撥奉宸苑內務府管理之淨業湖匯通祠地方爲館址。奉旨俞允。浙省聖因寺行宮同屬禁地。倘蒙殊恩准於文瀾閣旁建館儲書。揆之純皇帝准士子入閣傳鈔之德意。亦相符合。而各書照舊敬儲。毋庸移動。尤足以昭鄭重。遐溯乾嘉以迄今日。物力既大遜於昔。書籍又散佚無存。私家藏皮者。或爲海外捆載而去。中秘書則自內府陪都熱河而外。存者惟浙。恭讀 御製文瀾閣詩注。當時閣書繕寫之資。費帑金一百餘萬兩。誠亙古未有之鉅典。如蒙 恩准圖書館附建閣旁。非惟節省經費。抑且蔚爲大觀。至於行宮正殿遺址。擬卽敬謹修葺。准予人民瞻仰。以廣台沼之庥。凡在士民。歡忻鼓舞。詳請具奏前來。臣查該司所陳各節。以林屋洞天爲鄉嬛福地。雲昭日麗。游學海而仰皇仁。蠡測管窺。合儒林而依禁鑰。合無仰懇 天恩。俯如所請。

